



Komunikadu Imprensa

Periodu: Maiu 2011

Edisaun: 11 Maiu 2011

JSMP realiza treinamentu iha Suco Uma Uain Kraik, Distritu Viqueque

JSMP liu husi Unidade Justisa ba Feto hala'o treinamentu ba lider feto ou konsellu de suco feto iha Distritu Viqueque, Sub Distritu Viqueque, Suco Uma Uain Kraik. Programa treinamentu refere sai hanesan pakote ida husi treinamentu hirak seluk ne'ebé mak JSMP fasilita iha Distritu sira. Treinamentu ne'e ho nia topikun konabá "Vítima Feto husi Perspetiva Direitu Penál no Prosesu Penál inklui Lei Kontra Violénsia Doméstika.

Husi situasaun ne'e Diretór Interinu JSMP Sr. Casimiro Dos Santos hateten katak, *programa treinamentu ne'e sai hanesan mata dalan ba sociedade sira, liu-liu ba partisipantes husi Suco Uma Uain Kraik tanbá treinamente konabá Direitu ne'e foin premeira-vez sira hetan. Nia hatutan tan katak, treinamentu ne'e iha benefisiu boot ba sira tanbá sira bele kumpriende konabá sira nia direitu no oin sa atu bele prosesa sira nia kazu, liu-liu bainhira imfrenta problema hanesan violénsia doméstika hodi prosesa tuir mekanizmu justisa formal.*

Bazea ba observasaun JSMP nian iha terenu hatudu momós katak iha Distritu Viqueque, Sub Distritu Viqueque, Suco Uma Uain Kraik, menus duni informasaun. Informasaun ka materia ne'ebé JSMP oferese ba sira ne'e sai hanesan informasaun ida ne'ebé importante no premeira ves ba sira iha sira nia suco, tanbá durante ne'e iha sira nia suco nunka hetan treinamentu ne'ebé espesifiku ba asuntos refere.

Kondisaun ne'e hato'o rasik husi partisipantes sira, nomós konsellu Suco Uma Uain Kraik. Nune'e mós iha observasaun JSMP nota katak, comunidade iha suco ne'e antusiasmu duni, tanbá tuir pedidu JSMP presiza deit ema nain 15 hodi partisipa iha treinamentu ne'e, maibé iha realidade konsellu de suco rasik mak propoin mai iha fasilitador hodi bele aumenta tan numeru partisipantes hamutuk ema nain 22 ne'ebé atende treinamentu refere.

Programa treinamentu ne'ebé JSMP realiza hetan apoiu finanseiru husi Governo Norwegia ka Royal Norwegian Embassy.

Aleinde ne'e iha parte seluk autoridade komunitária husi suco refere rekomenda ba JSMP atu iha futuru, JSMP bele fasilita treinamentu hanesan iha sira nia distritu hodi nune'e bele partisipa mós husi autoridade lokal iha nivel Distritu.

Atu hetan informasaun kompletu bele kontaktu direktamente;

Casimiro Dos Santos

Diretór Interinu JSMP

Email, casimiro@jsmp.minihub.org

Tlf: 3323883/7257466